

VÖDEM BOSO MA NOMS NUIK VPA

fa el Daniil Morozov pevotüköl

Yels teldeg dabina Volapüka.

Yels teldeg epasetikons, sisä söl ledinitik ä monsinyor: *J. M. Schleyer* < elegivom volanefe datuvoti letälenik oka: Vp löfikün obas. Volanef estunon, ven elilon balidnaedo vödi: „Volapük“. „Kisi el Volapük sinifon-li? Ad kis pediseinon-li?“ Ibä volanef ai binon boson nesenälöfik, if frut datuvota nulik seimik no binonöv vifiküno ün timil nilikün so klülädik, äsä ut boda adelik. Gelogölo adelo lü paset jü prim primikün Vpa, nolobs, das milats lemödik menas elärnons Vpi, das gebons frediküno püki mekavik at, e das valiks Vpans fiedik e skiliks smililons dö taspikülots difik, pedunöl sis prim e padunöls i nog adelo sekü lindif menas lemödik, kelans valemo no vilons lärnön bosu, u sekü bümicödöt netik löliko negitodik, u sekü netapleid jaludik, u sekü tudigid bleinälik pükas, kels binons sevädiks, ab lefikuliks, u sekü okiäl e votükamiäl. Ömans no vilons baivögons kodü todäl teik, do otans it no kanons datuvön igo bosu pülik. Nolobs, das Vp ya pestabon in ziläks difik mu veitiko su taled lölik, ed üf feits, pekodöl dub kods löpo penemöls, no ibinonsöv, tän volanef lölik ifimädonöv oki ad levikodavab datuvala.

Vp ya ebenosufon filaleblufi oka; ab bligäd Vpanas valik binos ad steifön, dat Vp papakonös veitikumo e vemikumo. *Momofolsöd lindifi alik! Momofolsöd okiäli rübik alik! O Vpans! föfiö! Gö! ko näms lölik! Namis valik sui däk! Käpten it vokom olis dub spikamarüd ai blümöl: el „Volapükabled lezenodik“! Alikan as kevoban lezilik, äs krigan pelanälüköl pladonöd oki ad galädöp okik! O Vpans! föfiö! Bravurolsöd!*

Zelobs yubidi teldegyelik! Liedo söl datuval löfik binom ya bäldan; om it no sötom-li üfo juitön nog ün lifüpasoar benoseki datuvota letälenik oka? Lesi! God galedonös omi ön stad benikün, dat obelifomös levikodi Vpa löfikün oka!

Stimablig Vpanas valik binon steif ad bläfön datuval legivoti dub Vp volanefe pegeväli. Meds ad atos binons vero klüliks. Ad krigön meds kil zesüdons: balido mon, telido mon, kilido mon! Söl datuval mutom komipön ta volanef nesiämiko taspiköl, ad gevön ute püdi netas, noe mutom komipön ta volanef no-Volapükik, abi ta ut Volapükik, too lindifik e okiälik. Laivobom nenropo ad lebumön ledomi magifik balöl e lovejadöli in svistäl netis valik, efe Vpi löfikün oka. Klu stütedoyös nemediko datuvali u bonedoyös бүкотис, kels osötöns pabükön pato gönü stim pro datuval gidöfö, a. s. zälalebuki söla: „Sleumer“¹, u yubidakadis Vpik fa länafed Volapükik pro Stirän pepübölis.

Del yubida teldegyelik binon del 31^{id} amula. Klu, o Vpans! föfiö! Vpaklubs valik zelonsöd deli at dub zälakobikams, spikots, benovipatelegrafots söle: datuval < pasedöls, penets e yegeds in gasesds, e r.... Volanef lölik sevonöd, das Vp nog lifon, das Vpans zelons yubidi Vpa löfikün okas! Vpan alik steifonöd ad slopükön züpanis nulik e stigädön flenis oka ad lärnön Vpi! Üf Vpan alik odunonöv atosi, tän yubid teldeglulid puzelonöv fa num degik Vpanas nuik.

Nogna padönuosös: „O Vpans valik! föfiö!“ Balölsös olis zü mastal gretik löfik obas ko näms pebalöl! Baläl oleadon rivön vikodi, e yubid luldegyelik ojononös levikodi lölöfik Vpa! *Volapük lifonös!* Datuvan löfikün Vpa lifomös!

Redakanef ela „Volapükabled lezenodik“.

<El „Volapükabled lezenodik“. Yel: 1899. Nüm: 219. Pads: 916, 917>

¹ El Sleumer ettimo äbegom Volapükanes valik ad sedön ome moni födü бүк zälapenäda pötü yubid teldegyelik Volapüka. Sevob nosi tefü sek primäta at.

VÖDEM RIGÄDIK

yela: 1899

Yels tels sibina volapüka.

Yels tels edepuboms, sis söl led. msl. Schleyer J. M. elegivom volefe datuvoti genialik oka, vpi löfikün obas. Volef estunom, ven elilom balidno vödi „volapük“. „Kisi vp malom? Kisi desänom?“ Volef aibinom ibo boso gezugälik, if pöföd datuvota nulik sembal no binom foviküno in timil lebalid so klatik, äs et boda vädelik. Gelogöls adelo jü begin balid vpa, nolobs, das mils lemödik menas elenadoms vpi, das geboms gälüno püki lekanik at, e das valiks vpanas fiedik e plobik smüloms dö smatapüks difik, pemeköl sis begin e pameköls i nog adelo sukü lindif menas lemödik, kels no viloms valemo lenadön bosu, u sukü netalucödät nepegitöl löliko, u sukü netapleid jaludik, u sukü tudivam bleinik pükas molädik, ab lefikulik, u sukü itasük e nulamasük. Teldikans no viloms baivögön kodü todäl teik, do oms it no kanoms valemo datuvön bosu. Nolobs, das vp estüdom ya oki in zilaks veitikün su tal lölik ed if dikods, pekodöl dubü kods penemöl löpno, no ibinoms-la, volef lölik iläspanomöv oki al levikodavabi datuvala.

Vp eledulom ya filablufi oka; ab sugiv vpanas valik binom steifön, das vp papakomöd veitikumo e nämikumo. Mofö lindifi alik! Mofö itasüki rübik alik! Vpanas susö! Lukimö ko näms lölik! Namis valik su nafategi! Katan it vokom olis dubü pükarüd ailöbik, dubü „Vpabled lezenodik“! Alikan as kevobel lezilik, as kligan pelanimöl al solatöpi¹ okik! Vpanas susö! Lanimö!

Zälobs yubüpi telsyelik! Söl datuval löfik binom ya liedo bäledan; no li-sötom om it juitön nog in lifavendel leseki datuvota genialik oka? Lesi! God okonsefom beniküno omi, dat dalifomös levikodi vpa löfikün oka!

Stimablig vpanas valik binom steifam bläfön(a) datuvale legivoti pemeköl volefe dubü vp. Meds alos binoms leklulik. Al kligön meds kil zesüdoms: balido mon, telido mon, kilido mon! Söl datuval mutom kligön ta volef tapüköl nesiämiko, al legivön ote püdi netas, mutom kligön noe ta volef nevpk, soi ta volef vpk, ab lindifik e itasükik. Aivobom nezediko al lebumön ledomi magifik balöl e lovejadöl in blodäl netis valik, vpi löfikün oka. Yüfonös sikodo nemedamo datuvali u bonedonös bukötis pöbüköl ebo gönü stimab pögivöl datuvale, a. s. zälavobuki söla Sleumer u yubüpakadis vpk, pepüböl fa vpaklub zenodik plo Stirän.

Del yubüpa telsyelik binom del 31^{id} amula. Kluo vpanas susö! Vpaklubs valik zälomsöd deli at dubü zälalajasams, pükots, beglidamatelegafots pösedöl söle datuval, noteds e laltügs in gasesds e l.... Volef lölik nolomöd, das vp nog lifom, das vpanas zäloms yubüpi vpa löfikün okas! Vpan alik steifomöd süakön züpanis nulik e lanimön flenis oka lenadön vpi. If vpan alik odunom atosi, yubüp tselulid pozälom fa num balsik vpanas anuik.

Nogna vpanas valik susö! Balolsös olis zi glemasal löfik obas ko näms pebalöl! Balif odugom ali vikod e yubüp lulsyelik ojonomös levikodi lefulnik vpa! L i f ö v o l a p ü k ! Lifö datuval löfikün vpa!

Redakef ela „Volapükabled lezenodik“.

<Volapükabled lezenodik. Yel: 1899. Nüm: 219. Pads: 916, 917>

¹ Bükapök pekoräkon, sevabo: „solätöpi“.